

MES, ŽEMAITĖ...

MAKSVĪTIS Juozas

*Pemperių kaimas, Darbienu
seniūnėjė (Kretinguos rajuons)*

Mes, žemaitė, esam tvirtė,
Vėsus darbus muokam dērbtė,
Aram žemė, grūdus siejė,
Vo pasiejė – ožakiejė.

Siejė bolvės ėr rasuodna
Ož klietalės pri pat suodna.
Šabalvuonu vėsuokiausiu
Pri perenės daržė gausi.

Neožmėrstam ni čiobrieliu,
Krapu, kvīnu, ramunieliu...
Tonkė geram mes arbata –
Žuolės stėprėn juk sveikata.

Torem vėštu ėr šonieliu,
Aviū, vuožkū ėr paršieliu.
Šeram veršius, melžam karvės –
Mes nebėjuom miešlū smarvės.

Je pri pečiaus tesiediesi,
Ta iš bada ėr nodviesi.
Jodam, krotam vės i prieki –
Nuorem vėskuo daug torietė.

Mes, žemaitė, linksma būda,
Biegam plioškintėis i prūda,
Katram plaukiuo ėr karuosā,
Tuokėi dėdėlė kap buosā.

Ne iš kera esam spėrtė –
Ėr šnapšėlė muokam vėrtė.
Kas suodnalie, kas ož kūtės
Šotėn kalvie prisėtūpės.

Tik žemaitė tvėrta būda
Neožmėršiom bėndra bliūda.
Šatravuotu mėltu kuošė
Šaukštās maunam atsėluošė.



Šmakals rėibos, šviežė pėina –
Esi suotos vėsa dėina.
Tuokiuos kuošės prisėkėrtės,
Darbus dērbdam s neišvėrsi.

Kol dar tebie r poikės dėinas,
Lekam tekėnuom pri šėina.
Griebam, vėžam ėr kokštoujė,
Kad ėr sunkė – nedejoujė.

Mes be gala esam vīkė –
Melstėis biegam ė bažnīcė.
Atsėstoujė pri altuoriaus,
Traukam gėismės so gėiduorės.

Balsā tvirtė ėr galingė –
Vėsūs šmuotūs rėkalingė.
Kuołėj mumis konėgielis
Garbanuots kap aniuolielis.

Mes, žemaitė, kėita būda –
Potam vės(ė) ė vėina dėuda:

Ka krīžiuotė atlingava,
Tujau pat i skūra gava.

Nepabūguom, kad ginkloutė,
Kad ont žėrgās, kad batoutė...
Gėniem, stūmiem i pelkīnus –
I Lėipuojės marmalīnus.

Ėr magistros gala gava,
Žemaitėjė ka ožgava!
Dorbės mūši vėsė žėna –
Žemė kraujės tėn patvėna.

Graži mūsa Žemaitėjė
So kalnelės Kalvarėjės.
Tomsė mėškā, platės lonkas –
Švėnta žemė sauguo dongos.

Mes, žemaitė, esam tvirtė –
Diel tuo krašta galem mėrtė.
Torem Telšius, sava kalba,
Dieva ronkas šėrdi valda.



Untīdi Ontuona Ontuona portėgrapėjuo – 2024 m. Telšiū Užgavieniū
parsirėngielis